



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8 Yangia anidakangma : Tir Yimym tir_yimym

tir yimym TAPAK 7

**AO 2026 masaya tsüngda Djokovic
Adelaide nung asayatsü**

**PTI-i tepuokdak Imran Khan
ajurutsü meranger**



VOL. XXIII ISSUE NO. 71 (ADOK 71) DIMAPUR RASEMNÜ (WEDNESDAY) LUCHII (DECEMBER) 17, 2025 ₹ 5.00

AYO aser NSCN/GPRN (K) Khango putepshir

Kohima, December 16, 2025 (TYO): Angami Youth Organisation (AYO) aser NSCN/GPRN (K) Khango tsüngda December 15, 2025 nü Letter of reconciliation ka nung sign sütepogo.

July 2024 nung NSCN/GPRN (K) Khango-i amokmerenba ajanga parnok tsüngda ken o adoka liasü. Ajiüaka, Khango'er teloki Point No. 3 inyaksü mulunga agizükba sülen letter of reconciliation nung sign sütepogo. Iba Point nung osangkakettem nung nisung maitsü metetdaksütsü aser "Max Naga" azüoktsü lateta lir.

Tanü Japfü Hotel nung züngsem 5 agi akümba NSCN/GPRN (K) Khango teshimtet telok aser AYO züngsem 11 ajurutepa senden ka amen aser onüktem lemsatepba sülen Letter of reconciliation ayutsü lemtet ta President Kesosul Christopher Ltu-i ashi.

Iba shidi nung AYO President aser Khango group Kilo Kilonser Viniho Kiho nati sign asü. "Naga nunger taginüba aser Naga

nunger longjemtsü atema Angami Youth Organisation (AYO) aser NSCN/GPRN (K) Khango tsüngda December 16, 2025 nü senden ka menogo" ta shidi nung shia lir.

"Iba senden nung 2024 küm AYO aser NSCN/GPRN (K) Khango tsüngda August 20 Agreement benoka lemsatapa liasü. Commander, Western Command, N/A, NSCN/GPRN GPRN office ajanga December 15, 2025 nü August 20 Agreement indang Point No. 3 mulunga agizükba sülen telok anaprongi tatok agütsüteptsü aser putepshitsü bangjemtepogo" ta shidi nung shia lir.

NSCN/GPRN (K) ajanga yimjak nung "Max Naga" maitsü jangjaa metetdaksütsü aser anogo 15 tsüngda pa dak tim disciplinary action inyaksü ta point 3 nung shia lir. NSCN/GPRN (K)-i iba amai inyaksü mulunga agizükba ajanga AYO-i non-cooperation aser NSCN/GPRN (K) Khango nungi Angami workers ajak jatetba meyipa agitsü.

Central Prabhari Officer-i Kiphire Aspirational District semdang

Dimapur, December 16, 2025 (TYO): Central Prabhari Officer ADP/ABP Kiphire & Ministry of Micro, Small and Medium Enterprises Government of India Joint Secretary Mercy Epao-i December 15, 2025 nü Kiphire Aspirational District semdangogo.

Mercy Epao-i ketdangsürtem den senden amenba sülen Field Inspections senzüa liasü.

Five Crore Sectors of the ADP: Health & Nutrition, Education, Agriculture, Water Resources, Financial Inclusion &

Skill Development and Basic Infrastructure in Kiphire Aspirational District.

Kiphire Aspirational District nung ADP indang tongtipang sector pungu-: Health & Nutrition, Education, Agriculture, Water Resources, Financial Inclusion & Skill Development aser Basic Infrastructure renlokba lai reprangdanga liasü.

Iba senden nung district nung office tekolaktemi parnoki inyakba osangtem lemsatap aser ground level jenjang metetdakja liasü.

DAYO-i Aoyimkum tatalokba aitsür

Dimapur, December 16, 2025 (TYO): December 15, 2025 aonung Aoyimkum Village, Dimapur nung telungpur telok ka nungi mejangjatetba nisung kari inyakba mapa khukhua aitsür ta Dimapur Ao Youth Organisation (DAYO)-i metetdaksüogo.

Ayaterm nung telungpurtemi prangpong bener nija ki kati atu aser tsürabur taintem, tetsür aser tanurtem lia ki telung nung injang khatoka liasü. Iba ya ozüng maliba aser kiralongraba mapa ka lir aser iba ya inyakba sülen tashiyim agi DAYO züngsem ka den nisung pezü pur ao.

Meimchir temeten anema mashii inyakba aser nija ki nungpoka tua tashiyim inyakba ya lokti ajunga anema inyakba mapa ka lir aser DAYO-i odang metoktsütsü ta Media Cell sangdong ka nung ashi.

Telungpurtemi ceasefire ground rules alema i n y a k s a n g s h i a k a bangdakpurtemi kecha meshii yutsüba atema ashishir. Onoki ibala ozüng alema aser kiralongra mapa inyaktertem anema raratsü aser ozü züngsemtem kümzüka ayutsü ta DAYO-isa metetdaksüogo.

Nagaland-New Zealand tsüngda Kiwi atema tesentaktep yanglur



Kohima, December 16, 2025 (TYO): Hombar aonung tesü Kohima nung New Zealand aser Nagaland (India) tsüngda tematiba jenjang nung senden ka menogo.

Iba ajanga horticultural collaboration, technology transfer aser Nagaland nung farmer-led growth alitsü.

Nagaland ya aluyimba state ka lir aser nütsüng yongsük 70% tema aluyimba dak metaloka lir. State rongsenketzüng renlokba nung horticulture sector ajanga tongtipang shilem agia arur aser tesüiba küm ishika Naga aluyimertem aika taküm tajungba kümdaksüogo ta Horticulture Department Secretary-i ashi.

"Nagaland nung arem-min aser shiruru takar lir aser tsünüsenbongtsü atema tsüngküm kanga tajung lir. Asenok lisopur aluyimba ya teimba mozü mashir aser tanü horticulture ajanga yimtsüngtem nung rongsenketzüng tajungba kümdaksür" ta pai ashi.

Nagaland nung alimai nüngtugu süa tetshiba Naga King Chilli lir aser 2007 nung hottest chillies rongnung ka ta world records nung zülüokogo. Iba den külemi premium pineapples aser tanga horticultural crops züngsemogo. Nagaland nung kiwifruit tsünüba kanga junga inyaker aser iba jagi New Zealand den jembishinür ta Secretary-isa ashi.

"Iba jagi asenoki Zespri, New Zealand sorkar aser India sorkar tsüngda tesentaktep yanglur. Asenok ket nung infrastructure peria mali saka asen aluyimertemi

kanga tenendak, meranga inyaker aser bendanga agütsürtem lir" ta paisa ashi.

Nagaland nung 2001 nungi kiwifruit tsünütsü tenzüka liasü aser mezüng Zunheboto district shim aser iba sülen Phek o Kohima nung tsünüa ao, ta Horticulture Joint Director S Senka-i ashi.

Tang kiwifruit tsünütetba district temji Phek, Kohima, Tuensang aser Zunheboto lir aser Kiphire, Noklak o Peren nunga small-scale production areas lir aser iba ajanga Nagaland kübok tesem aika nung kiwifruit tsünütetba sayur ta Senka-i ashi.

"Nagaland nung kiwifruit tsünüba nung chemical use kanga mamshir aser iba ajanga süngjang tajung atanger aser international organic standards den putepa lir. Nagaland nung tsünütetba kiwifruit ya tachitsü balaka, talangka meraksar aser production clusters adokba ajanga shishilembatsü lenmang sadema lapoktsür" ta paisa ashi.

Ajisüaka certified planting material, scientific canopy aser nutrient management practices maliba den cold-chain, storage aser packing facilities peria maliba ajanga tayongzüka jenti ajurur, ta Senka-i metetdaksü.

"Alima nung kiwifruit kanga junga tsünüba nung New Zealand ya ka lir aser iba ajanga Nagaland nung temelenshi bener arutsü maongka agütsür. Parnok nungi orchard management nung technical training, canopy development aser pruning amala angazükba den certified nurseries

lapokba ajanga jenjang tajungba akümtsü" ta paisa ashi.

"Iba amalitep ajanga süngjang teimba tsünütettsü, aluyimer sen teimba arutsü, kiwifruit clusters tashitaitba akümtsü, rural employment ajungkettsü aser horticulture sector nung Indo-New Zealand amalitep alitsü" ta Senka-isa metetdaksü.

"Nagaland sorkari onok pelashishia agizükba atema pelar aser atsütem semdangtsü yongyar" ta Zespri, New Zealand nung Global Public Affairs Head Michael Fox-i ashi.

Nagaland nung tsünüsenbongtsü maitsü balaka lir aser alima nung Naga King Chilli agizükba atema tenüngsang agütsür ta pai ashi.

"Zespri kübok New Zealand nung kiwifruit tsünür nisung 2,800 shi dena lir. Zespri ya grower-owned organisation ka lir aser tanü nenoki kiwifruit jenjang angateta inyakba ama küm 20 tejakdang New Zealand nung kiwifruit tsünürtemi tenzüka liasü" ta Michael Fox-isa metetdaksü.

Zespri ya India atema market tila ka dang lir saka health & nutrition nung temulung agütsür consumer teimba akümer aser tarutsü shishilembadak tongti ka asütsü ta paisa ashi.

Zespri ya India nung küm 15 shi lia arur aser onoki consumer awareness nung temulung agütsür, distribution networks tashi itshir aser kiwifruit ya fibre, antioxidants aser vitamin C aika aliba "superfood" ka ta ajungketer ta ketdangsürtemi ashi.

Ghonda 24 tsüngda foreigners 4 Assam toktsür aotsü tuyur

Guwahati, December 16, 2025 (Agencies): Karbi Anglong district administration-i foreigners ta sangdongba nisung pezü dang ghonda 24 tsüngda Assam aser India toktsür aotsü tetuyuba agütsüogo.

Iba ya public interest aser internal security nung ajemdaker agütsür ta District Magistrate Nirola Phangchopi-i ashi.

Immigrants (Expulsion from Assam) Act, 1950 nung Section 2 kübok iba tetuyuba agütsür. Parnoki Dhubri, Sribhumi mesüra South Salmara-Mankachar routes

ajanga linük toktsür aotsüla aser tashi mangara sorkari tashiyim agi anientsü ta District Magistrate-i ashi.

Foreigners' Tribunal, Karbi Anglong ajanga küm 8 tashi ken o balala angadanga aruba sülen bendangertem ta sangoktsüba nisung pezü rongnung Dudu Colony nungi Md Abas Khan dena lir. Pa ya October 16, 2017 nü foreigner ka ta sangokja liasü.

Dudu Colony nungisa Md Amir Uddin dang February 7, 2016 nü foreigner ta sangoktsü. Rang Nagar nungi Md Mainul

Hoque dang November 8, 2023 aser Purana Lahorijan nungi Md Anuwar Ali dang January 3, 2015 nü foreigner ta sangokja liasü.

Senior Superintendent of Police, Karbi Anglong-i expulsion orders mapa küma inyaksü aser iba indang osang agütsütsü tetuyuba agütsüogo.

Sorkar department temia parnok tenüngtem electoral rolls nungi agentsü, ration cards aser Aadhaar numbers meyipa agitsü aser government welfare schemes o social security benefits ajak shibangtsü tetuyuba agütsüogo.

Gorkha Union Mokokchung küm 50 ajungba benjong mongogo



Mokokchung nung Gorkha Union Mokokchung Golden Jubilee benjongmong sentong akadang tetushi tejaoker NLA Speaker Wb.Sharingain Longkumer-i jembir (Telong) aser telok kati yar tsüngsangdang tangokba noksa.

Mokokchung Luchii/December 16(TYO) : Gorkha Union Mokokchung tenteter kümzüng 50 ajungba Golden Jubilee benjongmong sentong Mokokchung Town Hall nung kanga dang longso longsoa agiogo.

Tanu iba jubilee sentong nung tetushi tejaoker Nagaland Legislative Assembly Speaker Wb.Sharingain Longkumer-i jembidang Nagaland nung Gorkha nung 1871 nungi küm 154 tashi Naga nung den külemi lia arur talisa Mokokchung nung Gorkha nung timi litettsüsa Ungma ,Mokokchung, Chuchuyimpang aser Khensa parnok yim pezüi nüburtem timi anükba ajanga lir ta ashi.

Gorkha nung Mokokchung nung aliba ajanga Mokokchung nung loktiliba,rongsenketsüng aser saisapong nung terenlok agütsüogo. Gorkha nüburi Mokokchung nung aliba nüburtem shisatsü agizükteta lenla ajak nung litetba ajanga külem telongjem Mokokchung ajungketba nung shilem agidar ta paisa ashi.

Sharingain Longkumer-isa 2047 küm jibo India ya developed

nation akümtsü nükjidong nung Prime Minister Narendra Modi ajanga “Vikshit Bharat-2047” sentong tenzükogo. Iba denji repsema Nagaland nunga “Vikshit Nagaland-2047” sangdongogo süra asenok Mokokchung-a “Vikshit Mokokchung -2047” tenzüksüla ta ashiba den ano Mokokchung district nung constituency ter prong nunga tenzüksüla ta ashiba den pa constituency “Vikshit 26 Aonglenden Constituency-2047” sentong tenzüksüla, kechiyong constituency ka renlokba ajanga dang Mokokchung district terenlokji shisangtsü. 2047 atongtsü asoshi küm 22 dang lir Mokokchung renloka ajungkettsü asoshi aser Mokokchung sensopur Aor kisüngi meinyaktettsü, anungji nenok Gorkha nung nungita tang ama yariteptsüla ta ayongzüka jembia.

Mokokchung nung nenok aruagi alibaji Naga nung rongnung ajak rongnung mayangsür(pioneer) den alir tanenoki jembir saka iba Mokokchung yanglua tenzükdang nenok Gorkha

nung dena liasü, anungji nenoka pioneer rongnungji dena lir, aser kasa tangatetba nung tang mapang nunga nenoki shilem tajung agidar, anungji Mokokchung tejakleni aotsü asoshi asenok tsüngda angatettepa longjem lidi ta tetushi tejaoker NLA Speaker Wb.Sharingain Longkumer-isa jubileemonger Gorkha nung ayongzüka jembia liasü.

Kasa sentong nung alakteta jaoker Mokokchung Deputy Commissioner Ajit Kumar Verma IAS, mejeta jaoker Ao Senden Tongti Zülur Wb.Intipokyim, Mejeta jaoker Nagaland Gorkha Association President Nobin Pradhan parnokia jembiba den Jubilee Organising Committee Convenor Maniraj Rai ajanga tarur pela agizüka jembia,Jubilee Nüngtem O Director(Retd) Sanjay Rai ajanga lemsatep,Prof.Rev.K.Dhanbir Rai ketdangsüba nung jubilee nungo kakat tetushi tejaoker ajanga saya aser Gorkha Union Mokokchung ajanga tepela o jembiba den sobaliba yar tsüngsangtem shilem balala agia liasü.

MLA Achumbemo Kikon-i Ralan SDO (C) Office semzüksü



MLA & Chairman, SDPDB Bhandari, Achumbemo Kikon aser ketdangsürtem December 15, 2025 nü SDO (C) office Ralan, Wokha semzüksüdang tangokba noksa nung angur.

Dimapur, Luchii/December 16 (TYO): MLA & Chairmen SDPDB Bhandari, Achumbemo Kikon-i December 15, 2025 nü Wokha district kübok Sub-Divisional Officer (Civil) office, Ralan semzüka liasü.

Iba sentong nung jembidang, Kikon-i nüburtem aser stakeholders nem tenüngsang agütsü aser office tasenba ya meta talang nung Administration anasabai bener aruba nung alizüng tongtipang ka lir, aser iba ya ajanga nübur tenzüka mapa tajungba akumtsü aser grassroots institutions den amalitep akaba tali tashi itshitsü ta ashi.

Pai ketdangsürtem dang bendanga agütsür ochishia tenzüksü ajungshi aser kasa mapang nüburtem dang amalitep akatsü ayongzüker aser terenlok asoshi külemi teka amteper inyaksü lanur lenirtem ajungmesoa liasü.

Arütsülen ajak aintsü aser terenlok asoshi sorkar temulungtetba nung lir ta pai ashi.

Assistant Engineer (CAWD), Er. Daniel H Lotha-i technical report agütsüba mapang SDO (C) office ya sen 80,00,000 agi yanglu ta ashi.

Iba ki ya RCC structure lir aser tasazük 2292.94 Sq.ft aser yangi water supply & sanitary,

septic tank & soak pit aser power connection lir, ta pai ashi.

Iba sentong nung Tsenhungo E. Ngullie, SDO (C) Ralan menden liasü aser Pastor Renben Ovung, Chandalashung New village ajanga office tasenba meshiteta sarasadem.

Sentong nung Renbomo Ezung, Additional Deputy Commissioner Wokha; Samuel Ovung, Chairmen Ralan Area Lotha Hoho aser Ren Murry, Contractor nungeria o tatsütsü jembia liasü aser sentong tembanga Lawrence Ovung, Chairmen, Ralan Range Union, Dimapur ajanga melepzüng o jembia.

Department of School Education ajanga metetdaksür

Dimapur, Luchii/December 16 (TYO): Department of School Education ajanga Heads of Government Schools (Teachers-in-Charge, Headmasters/Asst. Headmasters/Principals/Vice Principals) ajunga dang December 18, 2025 tashinung reports tem pei DEOs/SDEOs nem agütsütsü metetdaksüogo.

Sangdong ajanga ashiba agi, class shia kaketshir performance (enrolled, appeared aser passed) tejangja Executive Summary of 2025 Academic Year agütsütsüla. High Schools aser Higher Secondary Schools (enrolled and appearing HSLC and HSSLC examinations) atema Class Nursery nungi Class 9 attendance registers indang report balaka agütsütsüla.

Tesayurtem aser staff tem densema nisung ajak indang ita shia 2025 attendance report aser leave agiba tejangja

agütsütsüla.

Classes ajunga atema class shia 2025 küm weekly timetable sample copy.

2025 küm hopta shia sayuba (assigned classes per week) dak sendakba nung head of school densema tesayurtem ajunga indang report.

DEOs/Sr. SDEOs/SDEOs ajunga dang pei jurisdiction kübok school ajungai data bendenba mapa shidak inyaktaksütsü aser hard copy tem Directorate of School Education nung aliba Dispatch & Receipt Section, Room No.1 (318) nem December 22, 2025 tashinung agütsütsü tuyur, ta sangdong ajanga ashi.

Iba dak sendakba nung metetpelatsü atema Additional Director (DoSE) - 8974111249 aser Deputy Director (DoSE) - 9856189265 den jembitsü akok.

Ajaki iba mapa shidak inyaksü metetdaksür, ta Department of School Education sangdong ajangasa ashi.

Para Medical Training Institute nungja Nagaland Institute of Allied & Healthcare melener

Dimapur, Luchii/December 16 (TYO): Sorkari agizükba ama aser Ministry of Health & Family Welfare, Govt. of India kübok National Commission for Allied and Health Care Profession (NCAHP) Act 2021 nungi totuyuba agütsüba sülen 'Paramedical' mamshitsü atema Department of Health & Family Welfare ajanga Departments aser Stakeholders ajunga dang tang nungi tenzüka Para Medical Training Institute nungja Nagaland Institute of Allied & Healthcare, Kohima ta amshitsü metetdaksüogo.

Tang nungi tenzüka official records, deeds, tezüluba, inyakyim ajunga nung iba Institute dang "Nagaland Institute of Allied & Healthcare, Kohima" ta ajatsü.

Tebang o, tezüluba mesüra electronic nung 'Paramedical' nungja khenyongi mamshitsü tenokdangba agütsür. Departmental records tem nung Para Medical Training Institute ta aliba aser tarutsü nung osangtsüsang agiba ajak nung nungja tasenba 'Nagaland Institute of Allied & Healthcare, Kohima' ta amshitsüla, ta sangdong ajanga ashi.

Department of Art & Culture ajanga pelaba lemsateper

Dimapur, Luchii/December 16 (TYO): Hornbill Festival 2025 nung shilem tajung agiba atema Nagaland nung district balala nungi cultural troupes 18, Rongmei Tribe of Nagaland Cultural & Dancing Troupe, State Partner Cultural Troupes, Arunachal Pradesh aser Wancho Fusion Crew, Arunachal Pradesh ajunga dang pelaba lemsateper, ta Department of Art & Culture ajanga sangdong ka nung metetdaksü.

Parnoki sobaliba aser yimsüyimpang tajung bendanga agütsür sayuba ajanga taküm iba benjongmung takok anguba nung tongti shilem agiogo, ta ashi.

Department-i host village organizations ana, Phesama Youth Organization aser Kigwema Youth Organization dang nüburtem pela agizüka anepalua amshiba aser

tanenzükdak agütsüba aser cultural troupes nungdakba agüja anepalua amshiba atema pelar, ta ashi.

Department of Art & Culture indang ketdangsür aser staff temi bendanga agütsür pei nem nungloksüba mapa temulung agüja inyaka anogoshi sobaliba sentong aser benjong dak sendakba inyakyim balala takok ngua inyaktetba atema pela agizüker.

Anogoshi sobaliba sentongtem nung Cheryl Kevichusa aser Lee Chang nati ola tejangja agi sentong aniba atema pelaba lemsateper.

Nagaland indang sobaliba tajung kumzüka ayuba, wazüka ayuba aser temaba jenjangi ajungketba arok mission nung maneni telungjem tanüla nung teka amteper inyaksü imlaa atar, ta Department of Art & Culture sangdong ajangasa ashi.



Parliament Winter session nung Mahatma Gandhi National Rural Employment Guarantee Act (MGNREGA), 2005 melentsü atema union sorkari VB-G RAM G Bill benokba anema Congress MP Priyanka Gandhi Vadra aser tanga opposition MP temi longkak aitba noksa nung angur.

WB sorkari DGP aser tangar nem show-cause notice agütsü

Kolkata, Luchii/December 16 (Agencies): Taoba hopta Salt Lake stadium nung Messi indang sentong shitak achaayang masüba atema West Bengal sorkari Mongolbarnü DGP densema police officer tejentem nem show-cause notice agütsüogo.

State sorkarisa Bidhannagar Deputy Police Commissioner Aneesh Sarkar suspend sütsüogo, ta Chief Secretary Manoj Pant indang office sangdong ka ajanga metetdaksü.

December 13 nü Salt Lake football stadium nung sentong shitak achaayang masüba atema Bushisüngdangba sülen ngutetba osang dak ajemdaker iba jenjang ya agiogo.

DGP Rajeev Kumar nem agütsüba show-cause notice nung, iba sentong agiba tesem nung inyakym meshidakbatem indang rasa ashitsü tetuyuba agütsüogo

aser ghonda 24 atakzüksüogo.

Bidhannagar Police Commissioner Mukesh Kumar nema kasa show-cause notice agütsü aser iba sentong achaayangba nung commissionerate shilem aser inyakym idang jangjashitsütsü tuyua liasü. Decemeber 13 nü iba sentong agiba mapang Messi reprangi aruba fan tem kanga temulung mesüi stadium nung mepetmesü tulu adoka liasü.

State sorkari Bidhannagar deputy commissioner mapa nungi anentsüogo aser iba anogo mapa sentoka toktsüba atema pa anema departmental proceedings ka tenzüko, ta kasa sangdong ajanga metetdaksü.

Youth Affairs and Sports Department Principal Secretary Rajesh Kumar Sinha nema show-cause notice ka agütsüogo aser Salt Lake stadium Chief Executive Officer Deb

Kumar Nandan-a mapa nungi anentsüogo.

Iba stadium nung mepetmesü adokba sülen sen crore 2 shi alang takoksa ajangshiogo.

Kasa mapang nung Lionel Messi indang 'GOAT India' tour dak sendakba nung West Bengal sports minister Aroop Biswas-i Mongolbarnü chief minister Mamata Banerjee dangi shiti ka zülua pa mapa nungi anentsü benokogo.

Taoba Honibarnü Messi indang fan tem pa reprangtsü asoshi Salt Lake Stadium nung adenshi saka sentong ayongertem inyakym meshidakba aser VIP temi pa nokdanga ayuba ajanga nüburtem mepelai mepetmesü adoka liasü.

Mepetmesü atalokba sülen Mamata Banerjee-i ken o bushisüngdangtsü tetuyuba agütsü aser kasa anogo iba sentong ayongertem rongnung tongtiba Satadru Datta pua liasü.

West Bengal nung SIR draft nungi tenüing lakh 58 aginogo

New Delhi, Luchii/December 16 (Agencies): West Bengal nung tang benoka inyaka aliba Special Intensive Revision (SIR) kübok draft roll nungi voter million 5.82 dak tema aginogo. Iba list ya Election Commission-i Mongolbarnü sangdongogo, kong voter million 2.4 shibo süatokogo.

South Kolkata kübok Bhowanipore nung polling station nungi voter 127 aginogo, kong West Bengal chief minister Mamata Banerjee-i la indang vote agütsür.

"Draft roll sayaogo. Sür aliba voter, absent, tanga tesemi aoba aser duplicate voter million 5.82 shi draft roll nungi aginogo," ta EC ketdangsür tejen kati ashi.

2026 küm January 15 nü tashi EC-i voter tem aser political party tem nungi voter

tem tenüing aginba dak sedankba nung tashishiba aser temepeshiba balala agizüksü. Ken o angadangba aser verification ya January 16 nü tenzüksü aser February 7 nü tembangtsü. Tatembangbuba roll ya 2026 küm February 14 nü sangdongtsü.

Ketdangsür tejen kati ashiba agi, voter million asemshi 2002 list den mesendaktsütepteter aser ano enumeration form nung aibelen aliba ajanga voter million 16.7 shi EC-i asadanga liasü.

Aibelen ya category tenet küma lemsaogo, kong tebu tenüing 2002 list den meputepba, voter aser tsürapur tsüingda arishi küm 15 dak tajemba aliba mesüra küm 50 dak timba aliba, tetsü tebou den arishi küm 40 dak tajemba tsüingda aliba aser gender meshidakba densema lir.

"Ki semdanga aoba sülen

BLO temi item voter tem indang osang tejangja agitsü. Iba sülena aibelen ngutetra parnok ya ken o angadangtsü atema ERO-i jaoktsü," ta ketdangsür yagi ashi.

Voter million 8.5 dak tema tebu tenüing meputepba putetogo. Voter million ana shi arishi küm 45 dak tema tetsüingda lir saka 2002 list nungbo mali. Voter million 1.1 tsürapur den arishi küm tetsüingda küm 15 dak takjemba lir. Maneni voter million 1.3 indang gender meshidaki lir.

Voter tem aginba kulitem: Asüba: 2,416,852; Tesem melenshiba: 1,988,076; Missing: 1,220,038; Duplicate: 138,328; Tanga: 57,604; Total: 5,820,898

Special Intensive Revision sülen West Bengal voters draft list ya state assembly election magi tsüingda sangdongtsü koba taruba küm agitsü lir.

Delhi nung PUC malir nem totzü magütsütsü

New Delhi, Luchii/December 16 (Agencies): Brehostibarnü nungi tenzüka Pollution Under Control Certificate (PUCC) shitak maliba gari kiburtem nem petrol pump tem nung totzü magütsütsü, ta Delhi indang environment minister Manjinder Singh Sirsa-i Mongolbarn metetdaksü. Linük yimtiba mopu kanga menena akümba mapang tang iba jenjang agiogo.

Delhi nung Air Quality Index (AQI) anogo asem tashi "severe" category nung aliba sülen Mongolbarnü "very poor" jenjangi aluba mapang tang iba telemtetba ya agiogo.

September ita police personnel temi agütsüba challan tem rongnung 54,615 (17%) bo PUCC mendeni gari anir senzürtem liasü, ta enforcement data ajanga sayuogo. October ita-a PUCC challans (23%) 68,986 agüja liasü.

Linük yimtiba nung mopung kanga menena akümba dak sendakba nung osangbenertem den sensaksemba mapang Sirsa-i, "tanü AQI 363 nung lir, koba severe category küboki

aiter, aser taoba küm 10 tashi yimti kasa jenjang nung aruogo. Taoba küm kasa anogo AQI 380 liasü saka tanübo 363 lir," ta ashi.

Paisa, iba tamakok asoshi taoba sorkar aitsüogo. "AAP-i taoba küm 10 tsüingda Delhi nem iba tebilemtsü agütsüogo," ta Sirsa-i ashiba PTI-i metetdaksü.

Paisa, mopung menenba tebilemtsü ya ita ishika tsüingda mebentettetsü ta ashi. "Ita 9-10 tsüingda AQI ajemdaktsütsüji sorkar kechaia makoktsü. Delhi nung mopung menenba atema ni tatok meshir. Ochi mashi AAP sorkar dang nungibo onoki mapa tajungba inyakdar aser onoki anogoshia AQI tajemba kümdaktsüdar. Iba mopung menenba tashidak ya Aam Aadmi Party-i asenok nem agütsü aser iba ya bentettsü atema onoki inyakdar," ta pai shisem.

Delhi nung mopung menenba jenjang "very poor" category-i aluba sülen minister-i iba olen lemsatepogo. Anepdang 8 ako tashi nung 24-hour average AQI ya 377 liasü.



Goa indang Birch by Romeo Lane nightclub kong mi adoka nisung 25 tepseta liasü, iba club kibur Gaurav Luthra aser Saurabh Luthra na New Delhi tonga aruba mapang tangokba noksa nung angur. Tena ya Mongolbarnü Thailand nungi yok aser Delhi atongba sülen Delhi aser Goa police-i pua liasü.

India & Jordan na shishilemba \$5bn tashi ajungkettsü bangjem: MEA

New Delhi, Luchii/December 16 (Agencies): India aser Jordan nati fertilisers, especially phosphates amala tongtibang sector tem nung tesendaktep akangshia taruba küm pongu tsüingda bilateral shishilemba USD billion 5 tashi ajungkettsü atema nukjidong yuogo, ta external affairs ministry (MEA)-i PM Modi-i Jordan semdangba indang osang agütsüba mapang metetdaksü.

PM-i Jordan semdangba indang osang tejangja MEA secretary (South) Neena Malhotra-i metetdaksü. "Küm 37 tsüingda tang mezüngbuba PM kati mejeta iba linük semdang," ta lai ashiba den, PM-i Jordan semdangba ya kanga tongtibang, kechiyong linük ana bilateral tesendaktep yanglur taküm küm 75 ajunger, ta Neena-i ashi.

Osangbenertem den sensaksemba mapang Malhotra-i, telok ana tsüingda security dak sendakba tongtibang onüktem benoka sensaksemogo. Lai, "India-i kiralongrartem anema raraba Jordan-i pusemba

metetdaksüogo aser kiralongraba inyakym aitsüogo," ta ashi.

Sensaksem ya tongtibangsa rongsenketzüng nung tesendaktep dak rangloker agiogo. Malhotra-i ashiba agi, linük ana tsüingda fertilisers, especially phosphates dak sendakba nung teka amtepa inyaktsü sensaksemogo aser PM Modi-i taruba küm pongu tsüingda bilateral trade USD billion 5 tashi ajungkettsü asoshi benoka liasü.

Maneni tongtibag sector tem nung tesendaktep atsülangshitsü atema tenangzüktepba aika yangluogo. MEA South secretary yagi ashiba agi, energy, digital technology, water management, sobaliba aser nüburtem tsüingda tesendaktep dak sendakba nung MOU aser tenangzüktepba aika yangluogo.

Laisa, sobaliba tsütsü tesendaktep akangshiba indang metetdaksü. "2025 nungi 29 tashi Cultural Exchange Program benoka agiba ajanga linük ana tsüingda sobaliba tesendaktep tali tajungba kümdaktsütsü," ta lai shisem.



TIR YIMYIM YIMOBILEM (EDITRIAL)

DIMAPUR WEDNESDAY, DECEMBER (LUCHII) 17, 2025

Christmas Industry

Asenok asoshibo Christmas ya asen kùmtetdakba Yisu Khrista asoba anogomung benjong saka Yisu dak mamangba dang masü saka Yisu temeim yimsü anemer kin, China asoshibo Christmas ya Industry lir, kechiyong parnoki Christmas dakbo mamanger saka Christmas amongtsü purtem asoshi kima aser kilong nung enokba decoration osettembo ajak parnoki yanglutsür. Ibaji Israel nung Yihuda nungertemi Yisuji Tsüngrem chir aser Pa alima meimchir temenen nungi kùnzüksü asoshi alimai aru tabo mamanger aser magizüker saka Israel lima nung Yisu soa ainba aser yangji Pa asüba aser shia arua kotaki atuba tatalokba otsü aser tesemtem reprangi arur raliwalirtemi Israel lima takar kùmdaktsüba amai lir. Aji oda, Yisu yimsü anemer lima, China nunga Christmas aru matateter, anungji December ita tong metongka tongtibang tesem aser hotel ajak nung Christmas ki naro enoktsü, anungji tang ya asenok Chinai odangra yimti yimdong aser kilong kima ajak nung Christmas decoration enoka aliba agi China-a Khristan lima-ang ka mesüka angutsü. Aji oda, Yisu yimsübo anemer saka Yisu asoba agiang takar akümba limaji China o Israel na asütsü. China nung Christmas ki naro osettem yangluba yimtittem rongnung Yiwu yimti nung decoration osettem ya teimba yanglur. Iba yimti nung Christmas decoration yangluba tesem 600 shi lir aser alima nung tang ama Christmas mapang decoration nung amshiba osettem ya noklang nung 80% bo iba yimti nung yangluba osettem lir. Tesümgangtsü aser jangratemtsü kaji, China nung Christmas decoration oset yanglurtemi decoration oset tapu 2000 dak tali yanglur aser itemji alima kin noklang dak talii yoker aser item limatem rongnung, talisa, Europe aser America limatem teimba agir. Item osettem rongnung asenoki amshiba Christmas tree, tinsel, light aser plastic balls ajak ya China nung yanglubatem lir. Item decoration osettem yangluba tesem nung mapa inyaker nisung aika lir aser item jagi teka agi plastic ball nung sentsü atepba kisüng nungi aaba agi parnok nüngdak peria aar. Aji oda, Christmas tree, balls aser tinsel amala decoration osettem ya teyanglurtem jagi sentsü tapu balala yanglur aser kùm shia alima tesem balala nungi pei aginüba sentsü jelia meshia atar. Item Christmas decoration osettem ayokertemi ashiba agi, anüolen alir kintemi decoration osettemji tajungang aginer, anungji parnoki kanga junga yanglutsür aser sen aikati ayoker. Ajisüaka, ano alima kin kar dangibo jenjang tezüba osettem yoker, anungji item nungjibo tajangzük tulukabo mali. Iba ama ya kodang bilemdangdir, alima nung benjongbentsü aser amongtsümunng shia nung shisa akar aser mapa inyak ashir asoshibo sen aadak lenmang aika lir ta reprangtettsü. Atangji, asenok sobalibaren nung asenok ya business inyakba kin masü, anungji asenoki komaser sen aatsü, kechi ayok nung ajungtsü aser komaser asen rongsen züintsü ta asübalen mebilemdanger. Aji oda, tangarbo tang ama benjong mapang arudang ya, kechi ayoktsü (?) ta bilemer saka asenokbo kechi alitsü (?) ta bilemer, anungji asenok kolok nung mezüngyongi ayoktsüba masü alitsüba dang enokja lir. Joko, iba kolokji meyiptep meshiogo. Aji oda, kodang asenoki benjongbentsü aru shia kechi yokla (?) ta bilemstü tenzükdir, asenok shisa tenük agi benjong mapang nisungtem nüngdak reprangtettsü aser asen kolok aser teka agi item nüngdakji yanglu tenzüksü. Tanü China nungertemi Christmas ya Khristan-tem benjong ka dang masü saka sen aatsü mapang tajung ka ta reprangteta alima kin noklang tema asoshi Christmas decoration osettem yanglutsüba industry-ji oset yangluba tesem ka dang masü saka China nung lanurtem aika item mapa inyakdak mapa inyaktsü maongka angur. Atangji, China nungertemi tajangzük arishia oset mashimashi meyanglur, kechiyong business-ji kùm ka atema masü saka teti atema ta parnoki meteta lir, anungji parnok dang nungi alir aser agir bendangertemi parnoki yangluba osettemji junger ta shitettsüsa parnokia kanga temulung agüja yanglur. Aji oda, takar limai oset tajungba aser jenjanga tasakbatem yoker aser sensaker limai tanüngbaji yoker, saka anapronglaji China nungertemi yangluba osettem junger ta alimai shitettsüsa parnoki yanglur.

OLEMSABANG

AZÜ-I PEI SAKTSÜ DANGI MEYIP

~ L . Kika Pongener

Aor shin o ka "Azü-i pei saktsüba dangi meyipba ama" ta jembir. Ano laishiba nunga...."Azü-i pei saktsüba dangi meyipba ama; pei tamashiba leplalepshirji lir" (A.Shin-26:11). ta zülua angur. Leplalepshiba, seplasepshiba aser meyipshiba ta asüba ya o tajung masü; o tamajung lir. Chiyungtsü kar joko machitsü aser majemtsü ta azüngashia jembir; jembiba amai meinyakteti tanaben meyipa achiba aser ajemba. Mapa kar joko meinyaktsü ta ajang-ajanga azüngashia jembir; jembiba amaji meliteti tanaben meyipa inyakba. Ken o kar kanga akang-akanga bangzünga lemteter; lemtetba ama meinyaki melenshiba. Nisung tamajung ka asüba; temulung meyipa taküm melenshir junga alitsü nangzük; saka nangzükba ama meliteti ano tejen mapa dangisa meyipa ao. Iba amala dangji leplalepshiba, seplasepshiba aser meyipshiba ta ajar. Ano laishiba nungjisa zünga...."Atemzüker meinyak dang nungipo matemzük tajungba" (Sayu-4:5). Kechi mapa sudir suaka....Nisung tsüngdang aser Tsüngrem tsüngdang azüngashia atemzüker; Azü-i pei saktsüba dangi meyipba ama tanaben leplalepshia inyakra alima nubur matsüngdanga sentsüh aser Tsüngrem tsüngdanga khuret tulu asütsü.

Naga nunger Reverend-tem, Pastor-tem, Missionary-tem, Evangelist-tem, laishirtem aser arogopur tamanger ajungai Tsüngrem dang azüngashia; Naga lima nung yi meyanglutsü, yi mayoktsü aser yi ajemba anendaktsütsü ta ajang-ajanga azüngashia nangzük aser atemzük. Naga limaji takong linuk ka asütsü "Try State" ta alima dang yimyim ayima sangdong. Ajiser, Nagaland Legislative Assembly nunga; yimsusur tatartemi 'Nagaland Liquor Total Prohibition' (NLTP) Act passed asü, aser joko kùm semer terok (36 years) shi arur. Naga lima nung iba temzüng-ozüng ya meyanglu tashi yi yanglua, yi yoka kibong taküm mesua alir kibong aika liasü. Yi ajemer aturar aser lanur aika dang liasü; ano kijung lanur aika yi agi jemseta asüba agi kijung lanutsür aika temeimtsüka amitsür kùmogo. Ajisuaka, kodang iba NLTP Act temzüng-ozüng yanglu, iba sulenbo yi dokan lapoka sadem-sadema meyoktettsüsa aküm nungji; yi ayoker kanga ajema aküm. Ano NLTP Act temzüng-ozüng yangluba sulenbo akhidang amato yi taluposa mongui akümnungji; tanem-tanemi yi ajemertem kanga ajema aküm. Aji oda, kechi mapa sudir suaka, temzüng-ozüng kecha talenba maka sadem-sadema aliba mapang dang nungi, temzüng-ozüng talenba yanglua aliba tetsüngdaji ongdang tuluka itta lir. Anungji NLTP Act temzüng-ozüng yangluba sulenbo yi ayokba aser ajemba kangasa ajema akümba aser temelenshiba ngua arudagi; aser yi agi jemseta asür kanga ajema akümba ngua arudagi.

Tawa tanü NLTP Act tamakok indang nubur karibo kanga bulua jembir aser ano lokti lennir karibo tesem kar nungpo iba ozüng salatsüba tebilemba indang lemsatepa jembiba Social Media sabang balala nung angur. Ajisuaka, kanga junga shisadangra, iba temzüng-ozüng yangluba sulen temelenshibaji mali masü; kangasa lir ta mapa agi kuli ngua arudagi. Kechi mapa sudir suaka kodanga meshi-meshia (100 %) takok mangutsü. Alima nung yimden bangdak aika nung temzüng-ozüng aika yangluaka, tashi mangarji karbosa alitsü. Ajisuaka, noklang nung 60 % - 70 % danga takok ngua inyaktetra aji takok anguba den küsa asütsü. Surabangla, tamakok ta asübaji shirnok tamakok asütsü....??? Shitakba kanga junga shisadangra; aji tangar tamakok masü sorkar tamakok aser ozüng ammertem tamakok tuluba asütsü. Hornbill benjong nungpo yi taluposa ayokba aser ajemba tadenertemi ashiba angazük....Surabangla ibaji shirnoki ketdang asür....??? Ano tanga State den arrtsüa aliba jila/yimtsüng ajak nung sungküm (Gate) yanglur tanüker mitkar ozüng ammer akang-akanga yua lir sernung; asen lima nung yi ayokbaji kolen nungi bener arur....??? Surabangla, ibaji shirnok tamakok asütsü....??? Anungji kecha manganutsü mali....Tangar tamakok masü ozüng yanglurtem aser ozüng ammertem tamakoka ta nuburtemibo ashitsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Council of Rengma Baptist Churches kûm 75 jungogo



Council of Rengma Baptist Churches kûm 75 ajungba benjongmung tembangba anogo choir temi temeja ken atenba noksa nung angur.

Dimapur, Luchii/December 16 (TYO): Council of Rengma Baptist Churches (CRBC) pur kûm 75 ajungba benjongmung aser inti mungdung December 14, 2025 nü Tsemintyü district kübok CRBC Mission Centre, Zunpha nung tembangogo.

Asemnü mungdung nungya CRBC kübok arogo 43 nungi delegates, tejaoker aser shilem agir nisung 2,500 shi aden ta osang ajanga ashir.

Iba mungdung ya CRBC arogo trok - Rengma Baptist Church Kohima, Dimapur Rengma Baptist Church, Rengma Baptist Church Chümoukedima, Rengma Baptist Church Sovima, Rengma Baptist Church Padam Pukhuri, aser Rengma Baptist Church Borlengri (Rengmagaon) lungjemer ayongzüka liasü.

Iba mungdung ya 'God's enduring faithfulness' omen nung ajemdaker Rengma Baptist Church telungjem nung aruba alizüing tongtipang aser kûm 75 tashi Khristanpur züina aoba, arogo ainba aser mission mapa inyakba bilemtetba mapang ka liasü.

Mungdung tenzüka CRBC

tir Yhunthonglo Khing-i jembidang Rengma arogo tamang indang lensatop, tanü putu teinyaktsü, telungjem, tanüla nung tain akumtsü aser tamangba tsütsü lenir adoktsü nungdakba indang ashi.

Iba mungdung tepiyong sentong nung arogo lenir aser theological educators temi o jembia liasü.

O jembirtem Rev. Haiwalo Apon, Executive Secretary, CRBC; Rev. Prof. Phanenmo Kath, professor, Eastern Theological College, Jorhat; Rev. Dr. Mar Pongener, General Secretary, Nagaland Baptist Church Council; Dr. Joshua Lorin, principal, Oriental Theological Seminary, Bade; aser Rev. Andrew Semp, finance secretary, Nagaland Police Baptist Church Association nungertem liasü.

Sentong shia Tsüngrem temeim bilemteta arogo tem dang Pa wadang bilemteta asendenshir ajemalua inyaktsü indang jembia.

Tekülem sentong den külemi iba mungdung nung tetsür, tebur aser lanurtem dak rangloker telok balala workshop ayongzüka nung kibong teinyaktsü, lenirtem mapa aser

mental health indang jembia.

Choir aser telok balalai ken atenba aser teburtem ken kakat nungi toktepba ajanga mungdung tali lemladaktsü.

Mapang talangka Tsüngrem tenzüka temaitsü iba mungdung mapang missionary aser evangelistic service dak sendakba Phenyuga Kemp Memorial Award ya Rev. Ram Prasad Subedi nem agütsü aser pastoral leadership aser arogo terenlok dak sendakba Rev. Viliezhü Kent Memorial Award sempet ya Rev. Shwelo Thong nem agüja liasü.

Meneni Dandelion Community indang direstor Dr. Kim In-soo aser JC Kim nungeri CRBC ministry maneni yariba atema tenünsang agüja liasü.

Mungdung mapang Rev. Methalo Thono-i 'The Rengma Naga Christian journey - 75th anniversary edition' nungou kakat ka sayaja liasü.

Kasa mapang 'Legacy of light' nungja agütsür Rengma Khristanpur aser CRBC puti otsü sayua liasü.

Taruba Council of Rengma Baptist Churches mungdung ya 2030 kûm Sendenyu Baptist Church nung amungtsü iba sentong nung sangdong.

ANO GO ABEN TSÜNGREM DEN

Ni kodang tambur südir

T. Ken 71:1-11

Tambur, tantsür asoshi iba ken ya kanga tanganütsü ken ka lir. Iba yagi tambur akümdang Tsüngremer temoatsü nung balaka rangloker. "Tambur tia nung nai ni teindok; tashi makai akümdang nai ni senzuka teyutsü" (t.9).

Asenok tambur akümdang Tsüngremi asenok asoshi kechi inyaker? Asenok tain kümer tebilemtsü agi atongdung Pai asenok yarir. Tashi mait tatishitsü. Tekong 9 nung Dawidi kechi indang jembir: "Tashi makai akümdang nai ni senzuka teyutsü." Tema takümüji tashi meiti akümer, saka telunglen anogo shia tasen kümshitsü akok. Tsüngremi ne nungdakba tanelaren tashi agütsütsü.

Asenok tambur aküm tanga tebilemtsü ka asenok ajurubaji ratamata. "Ne dak, O Kibuba, ni kü tamang ayur: Ni kodanga taakdaktsü" (t.1). Iba lima nung aika melenshia aodang tambur kuma aodang asenoki ashitsü, "Kechi ataloker ni memeteter." Saka Tsüngremi ashir, "Reprangang, iba indang shisa tebulu. Kü dak amangang, aser ni na kodanga ratamata meyutsütsü."

Tasembuba tebilemtsüji tesüiba menungraba. Aiben asenoki jembir, "Tejenba anogotem tajung to meyipang." Dawidi ashi, "Kechiaser na kü teyimla lir, O Kibuba Tsüngrem" (t.5). Pa tarutsü mapang lia liasü. Tarutsü sota lir, asenoki memetet, saka Tsüngreni asenok tarutsü lia sotta lir ta asenoki metet.

Tatamsa asenoki nemnemshishi tebilemtsü ajurutsü akok. Tambur akümdang melamela nemnemshishi asür. Saka Dawidi ashi, "Anogo tepiyong ne nungsang agi, aser na tushiba agi kü bang sünga alitsü" (t.8). Kodang asenoki Kibuba den jajadir, Pai tashi mait aser terata ajak anebalur. Tarutsü tetsübu ajak pai repranger. Nemnemshinem melen Pa tenünsang asangba agütsür, anungji asenok tesünep nung tambur, tantsür akümer.

Taküm jenjang shia tejangja maongka aser tebilemtsütem lir. Aser item ajak ajanga Tsüngrem ne den lir. Na tambur tebilemtsü ajurur asü? Na tashi mait, terata, aser tesüiba menungra a nemnemshishia alir asü? Ne tetsübutem Tsüngrem dangi bener arung. Pai pa nüburttem yariba nung pelar.

Chhattisgarh nung 'anti-conversion rally' agiba sülen Khristanpur shisabolur

Raipur, Luchii/December 16 (Agencies): Khristmas atongtsü lia Hindu nung meyirijang aika Chhattisgarh nung rally ka ayongzüka ozüing alema amenoka aliba arogo aser mela-mela mesüzüktsü akokba lisopur tamangba yimsü melendaktsüba pastor tem anema temerenshi tulu agütsütsü akhangba ajanga Khristanpuri tebilemtsü khuret lemsatapa liasü.

Tribal nisungtem timba aliba Bastar region kübok Kanker jila nung December 14 nü rally ka nung jembidang Hindu nung lenirtemi "Sanatan Hindu culture" kumzüka ayutsü aser lisopur tamangba yimya akumtsübotsü ayongzüka liasü.

Iba rally ayonger Ishwar Kavade-i iba ya tamangba yimsü temeja ka dak tenük yokba masü ta ashi. "Onoki mesüzüka, ajungshia mesüra

tetsübo nung tamangba yimsü melendaktsüba dang anemer, kechiaser parnoki loktiliba nung timtem agütsür aser tribal nisungtem indang sobaliba maitsü amokmerener," ta pai ashi.

Kavade-i Chief Minister Vishnu Deo Sai-i anir Chhattisgarh state sorkar dang tamangba yimsü melenba anendaktsütsü atema tekeraba nung mera agitsü ajungshia liasü.

Ano rally ketdangsür Kamal Kishore Kashyap-i ozüing alema amenoka aliba arogo tem kanga junga bushisüngdung asütsü aser parnok indang pastor tem anema tapet temerenshi agütsütsü khanga liasü.

State yimtiba Raipur nung Khristan activist Binay Lakra-i ashiba agi, iba rally ayongzüker aser adener ya Khristanpur anema inyakba

nisung kari mashi leni aniba lir.

Vishwa Hindu Parishad (VHP mesüra World Council of Hindus) aser iba indang lanur kongsang Bajrang Dal ama Hindu yimsü akhang amshirtemi kûm aika Khristanpur anema campaign agia arur, ta pai UCA News dang December 15 nü ashi.

August ita Hindu nung telok kati iba ama rally ka ayongzüka sorkar dang lisopur yimtsüing nung ozüing alema yanglua aliba tekülem ki raksatsütsü aser item tesemtem nung Khristanpuri teyari agütsüba aser danga maparen inyakba tembangdaktsütsü akhang aser Khristanpur inyaksangshi ya tribal nisungtem temulung meyipdaktsütsü tebilemba nung lir ta ashi, ta Lakra-i ashi.

"Adangji nung ibai tebilemtsü tulu lir, kechiaser ozü nüburttem kuli tejangja

kecha meliaka tamangba yimsü melendaktsü ta tiazü nung tai tonglokja züka merenshia aser amokmerena aru," ta Rashtraya Christian Morcha (National Christian Forum) indang tir Kamal Kujur-i ashi.

Tribal Khristan lenir Kujur-i, tamangertem Khristmas aser New Year benjong amungtsü renemba mapang Khristanpur anema iba ama sentong ayongzüka ya tebilemtsü tulu lir, ta ashi.

Küm ishika Khristanpur reshikangshiba tali Kanker district nung ajangshia arur ta pai ashi.

"Khristanpur temenen ama kumdaktsüba ya tebilemtsü tulu lir, kechiaser parnok takum aser osettsüset lendong nung lir," ta Kujur-i ashi.

Tribal Khristanpur pei yimtsüing leper nung aremtsü memulungba pai bilemteta ashi

aser Kanker district kübok Havechur yimtsüing nung May 13 nü asüba Ankalu Ram Potai tatishitsü pai bener arua liasü. Pa Khristan asüba yong yimdaklir temi yangji aliba leper nung pa meremdaktsü ta osang ajanga ashir.

June ita Lachhan Dugga aser par kibong nungi züngsem trok Khristanpur asüba yong iba district kübok Huchadi yimtsüing nungi aridoka liasü.

Tamangertem pei yimtsüing nungi aridokba ya Khristanpur anema mapa tamajung inyaka aruba nung tang tesüsa atalokba lir, ta yangji aliba pastor temi ashir.

Chhattisgarh nütsüing yongsük million 30 shi aliba nungi Khristanpur shilem ana dang süaka yangji Khristanpur anema inyaksangshiba ya taoba kûm 165 liasü, ta New Delhi nung aliba United Christian Forum ajanga ashir.

AO OSHI ANGAZÜKDAK:**TANÜ ANGAZÜKTSÜBA OJANG****Tsümgmok**

(n) tsünglu arutsü mapang anüing nung ola tulu adokba (thunder)

* Tsümgmok amokdang tsümgpret dena pereter.

Tsüngnep

(n) tetsüing ajemoka aoba tamaitüsü (footprint)

* Arem nung shiti tsüngnep ngura kanga kümdangtsüla.



Tir Yimyim

OLONG PAITEP # 7362

1				2				3		4
5		6								
							7			
8										
										9
		10					11			
				12				13		
14										
							15			
16										

TIPLIN

2. Auonung chiyongtsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüing

-(6)

3. Tenarong maten

-(6)

4. A _ _ _ g

-(3)

6. Mopung apodoka

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7361 TELANGZÜBA**TIPLIN :**1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.**LANGTSÜNGLEN :**1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.**NAI-A YA METETTER**

Romania tsür fashion model Rebecca Dumitrescu Prodan-i "Youngest female football club manager" naroküm nguogo. Arishi küm 20 tain Rebecca-i first division club FC Hermannstadt Sibiu, Romania nung shares 50% tashi alizüka liasü aser iba ajanga club nung tongtipang nisung ka kümogo aser otsü tasen yanglutet ta World Record Academy-i metetdaksü.

Rebecca-i Milan nung fashion shows aika nung shilem agir aser Marangoni University, Milan nung fashion styling azünger.

Manipur University nung Japanese language training centre lapoktsü

Imphal, December 15, 2025 (TYO): Manipur nung lanurtem asoshi kanga dang tongtipang mapa ka tenzüker aser ibaji Manipur University nung Japanese Language Training Centre amenokba lir.

Iba centre atema NSDC International Limited (NSDCI) aser Department of Vocational Studies and Skill Development (DVSSD), Manipur University tsüingda MoU ka nung sign sütepogo.

Japan nung healthcare, hospitality, agriculture, aser manufacturing sector tem inyaksü atema iba centre nung Manipur lanurtem renemtsü. Iba ya India aser Japan tsüingda Government-to-Government (G2G) agreements kübok inyaker.

NSDC International Limited CEO Alok Kumar aser Registrar, Manipur University Prof. M. Premjit Singh nati MoU nung sign sütep. Iba

sentong nung Vice-Chancellor Prof. N. Lokendra Singh, Secretary, Skill, Labour, Employment and Entrepreneurship (SLEE), Government of Manipur N. Bandana Devi, IAS, university aser NSDCI ketdangsürtem aden.

"Iba tesentaktep ajanga Manipuri lanurtem alima tesem balala nung mapa angutsüba nung yaritsü" ta Vice-Chancellor Prof. N. Lokendra Singh-i ashi.

Department of Vocational Studies and Skill Development indang placement record tajung lir aser India aser Japan, USA, o Dubai dena linük balala nung kaketshirtem aviation, hospitality, teaching, banking, aser manufacturing sectors nung mapa ngudakja arur.

Tesüiba küm ana tsüingda NSDC International-i yaria alumni 28 tashi Japan nung

hospitality sector nung mapa ngua inyakdar. Parnoki küm nung Rs 12 lakh aazüker. Department-i Manipur aser Meghalaya nung startups 29 tashi yaria arur.

Japan nung inyaksü atema candidate temi JLPT N4-level Japanese proficiency (preferably N3) nüngdaker.

Tesüiba nung kaketshirtemi state adena orr Rs 3 lakh jungnüa endoka language aser cultural training agia aru, saka tang nungibo training nung endokba 50% agi tajemba asütsü ta imlar.

Mezüngbuba küm nung candidates 250 training agütsütsü aser iba nung ita 8-9 tsüingda Japanese language (JLPT N5/N4), sector-specific skills, aser cultural orientation agitsü. Training fees ji Rs 1.10 lakh lir aser skill loans o instalment options ajanga yaritsü.

BJP-i Assam Election In-Charge atema Baijayant Panda shim

Guwahati, December 16, 2025 (Agencies): Bharatiya Janata Party (BJP)-i December 15, 2025 nü Assam aser Tamil Nadu nung Assembly elections atema renemshiba nung shilem ka ama organisational appointments aika süogo.

National Vice-President aser Member of Parliament Baijayant Panda-i Assam nung

Election In-Charge inyaksü shimogo aser iba ajanga BJP-i 2026 Assembly elections atema renemshiba sayur.

Assam nung April 2026 meta Assembly elections agitsü sentong lir aser iba asoshi BJP-i jelia mapa tenzüker.

BJP-isa Assam elections atema Co-In-Charges ana shimba metetdaksüogo. Tenaji

Jammu and Kashmir nung MLA & Leader of the Opposition Sunil Kumar Sharma aser taoba Union Minister Darshana Ben Jardosh na lir.

BJP-isa Union Minister Piyush Goyal nem Tamil Nadu nung election maparen ketdangsüa anitsü mapa nungloksüogo.

Arunachal Anjaw lendong asoshi rescue operation tembangogo

Guwahati, December 16, 2025 (Agencies): Arunachal Pradesh kübok Anjaw district nung mini-truck lendong atalokba sülen search and rescue mission inyaka aruba tembangogo.

"Anogo pezünü inyaka arudang rescue teams-i tasümgang 20 ngutetogo aser nisung ka kümzüko" ta Anjaw Deputy Commissioner Millo Kojin-i ashi.

Lailiang nung gari lendong atalokba tesem nung jungjunga

bushitepba sülen Hombarnep 10:00 ako meta search and rescue mission tembangogo ta pai ashi.

Iba gari nung driver dena nisung 21 liasü ta Senior Superintendent of Police, Tinsukia-i osang jangjatsüogo.

December 8 aonung Hayuliang-Chaglagam road nung iba lendong atalok. Tinsukia district nungi aayangertem anir aodang gariji lungren kati ia tsükok.

Ajisüaka, lendong atalokba

sülen anogo ana lir külen ang December 10 nü gari lendong nung jenbuba nisungji anameta aliba Border Roads Task Force (BRTF) labour camp ka tonga oa osang agütsüba sülen ang ketdangsürtemi meteta aküm.

Iba osang angashiba sülen National Disaster Response Force (NDRF), Indian Army, BRTF personnel, local police aser district administration külemi yaritepa bushiteptsü tenzüker aser lendong atalokdak nungi tasümgang ajak ngutetogo.

Ledo nung class 9 kaketshirtem nem cycle 240 agütsü

Guwahati, December 16, 2025 (Agencies): Assam nung Chief Minister's Special Scheme nung shilem ka ama December 15 nü Ledo Sankardev Vidyapith Higher English School nung cycle alemba sentong ka agiogo.

Iba ya Tinsukia district nung 83rd Margherita Legislative Assembly Constituency kübok lir.

Iba sentong nung Class IX kaketshir 240 nem bicycles agütsü aser iba ya parnok school-i teti arutsü ajungmesoa agütsür. Sentong nung kaketshirtem, tesayurtem aser lokti lennirtem aden.

Margherita MLA Bhaskar Sharma lia kaketshirtem nem bicycles lema agütsü.



"Sorkari tanur ajak nem shisaliok ngudaksünür, talisa meta talang pilar aliba tesemtem nung aliba tanurtem dak tenük yoker. Cycle alemba mapa ya 83rd Margherita Legislative Assembly Constituency nung higher secondary schools ajak nung agitsü" ta MLA Bhaskar-

i ashi. Ledo Sankardev Vidyapith Higher English School nung tesayurtem aser staff-i sorkar nem tenügsang agütsüogo. Iba ya mapang shitak nung inyaker aser kaketshirtem kanga ajangzüksü ta parnoki ashi.



CLARK THEOLOGICAL COLLEGE

Aolijen, Mokokchung- 798601, Nagaland

APPLICATION TO THE FOLLOWING PROGRAMS ARE INVITED
FOR 2026 - 2027 ACADEMIC SESSION :

DOCTORAL PROGRAM (D.TH) :

- 1) D.Th in the Department of Communication
- 2) D.Th in the Department of Pastoral Counselling

MASTER OF THEOLOGY (M.TH) IN THE FOLLOWING DEPARTMENTS :

- | | |
|-----------------------|--|
| 1) Old Testament | 5) Christian Ministry (Pastoral Counselling) |
| 2) New Testament | 6) Christian Ministry (Education) |
| 3) Christian Theology | 7) Communication |
| 4) Christian Ethics | 8) History of Christianity |

Admission Requirements for M.Th

- Candidates must have **minimum 57.5% (60%) Overall and 57.5% (60%)** in the Cluster in BD for admission into M.Th in any branch/department, that is, **B grade (60%)**.
- For M.Th in OT and NT Two exegetical papers in OT and NT respectively, are required.
- For M.Th Christian Theology Pass (40%) in any one exegetical paper (College or Senate). Or pass in any one language (Sanskrit, Arabic, Pali, Syriac, Cultural Anthropology, etc.) paper examined by the Senate.

D.Th and M.Th Entrance Examination - February 10 & 11, 2026

THREE YEARS BACHELOR OF DIVINITY (BD) BEGINNING FROM 2026 - 2027 :

Admission Requirements for BD

- A candidate who has completed a Bachelor's or Postgraduate degree from a recognized University.
- Candidates holding B.Th. Degree from Senate of Serampore College, clearing all the required subjects including non-credits but required with 40 % shall join BD Second Year.
- ATA B.Th. holders who have cleared all the Senate qualifying papers.
- Mature Candidates who have cleared all the Senate qualifying papers. Matured Candidates are
 - (a) One who is 25 years of age
 - (b) Passed Class 10
 - (c) Have three years of ministry experience
 - (d) Have passed Mature Candidate Entrance Examination of the Senate.

DIPLOMA IN CHURCH MUSIC MINISTRY(DCMM) :

Admission Requirements/Eligibility

- Class XII passed in any stream or equivalent.
- Sing in pitch and sense rhythm.
- Genuine commitment for Church Music Ministry.
- Pass entrance exam in English subject.
- During the audition candidate will need to:
 - a. Perform One Piece (either Solo/Voice/any other instrument)
 - b. Do Listening test (Pitch and Rhythm)

BD & DCMM Entrance Examination - March 3 & 4, 2026

FOR APPLICATION FORMS AND INQUIRIES PLEASE CONTACT :

Principal	: +91 8837002616 / ctcprin@gmail.com
Academic Dean	: +91 8257939386 / ctcacademic@gmail.com
P.G. Dean	: +91 9916969528 / arenalongkumer@yahoo.com
Dean of Doctoral Studies	: +91 8787620561 / imsutoshi69@gmail.com
Music Teacher	: +91 7005780731 / jungtisenlcr@gmail.com

Or Visit - www.ctcnagaland.org.in

KIBONG KÜMER KÜM 50 AJUNGBAMONG

17.12.1975 - 17.12. 2025



Wb. Imwatiba Walling & Wt. Imsuyangla Jamir

Tsüngrem taochi tulu ajanga onoki teti meima aser akümsümbua aliba temeim Obala aser Ojala na kibong kümer Hon Jubilee mong tongtetsüsa takum arishi anema toktsüba asoshi Tsüngrem tenüng asanger. Nuna takum libaliro aser tamang sarasadem ajanga onok kümzüka, moaja anitetba asoshi tenüngsang agütsür. Ano maneni onok akümdong süa alitsü asoshi nuna nem anema aliba taküm aser arishi talang Tsüngremi moajangma.

- Temeim Chirmurtem, Kinüngertem,
Anükapang aser Semchirtem.

Cambodia nungi lisopurtem anir arutsü Thailand-i inyakdar

Bangkok, Luchii/December

16 (Agencies): Cambodia nung checkpoint shibangba ajanga Thai nunger mapa nung tongtibang arrtsü crossing inyaker meyirejang aika pei ka adena lisopur 6000 ani anir linüki meyipa moteti kümogo. arutsü atema Thailand-i Linük ana tsüngda taoba inyaktepdar, ta ketdangsürtemi Mongolbarnü metetdaksü. Arrtsü nung mangatettep adokba sülen Cambodia-i Thailand den arrtsü nung crossing ajak shibangtsüogo aser iba ajanga tang lisopurtem taolen makai kümer lir.

Southeast Asia nung kidanger ana tsüngda arrtsü km 817 lir aser tang tesem aika nung raratepdar. Alima kintemi rara anendaktsütsü atema merangdangaka linük anapronglai rara anentsü atema tejangraba kecha mesayui arudar.

Cambodia-i Poipet yimti

nung checkpont shibangba ajanga Thai nunger mapa inyaker meyirejang aika pei linüki meyipa moteti kümogo. Linük ana tsüngda taoba Hombarnü nungi raratepdar aser tang tashi nung nisung 40 shi tepsetogo aser nisung million tesadang dak tema pei talidak toktsür jenshiogo.

Cambodia nunger lenir Hun Sen-i ashiba agi, iba tesem nung Thai nunger sepaitemi taochi makai injang khaloktsüba nungi nüburtum kümzüka toktsütsü asoshi arrtsü shibangogo.

Ajisüaka rara agi mekongshi aliba tesemtem nungbo checkpoint tem lapoker lir aser tayimtsü ajanga senzusenpongtsüa tenokdangba agüja mali," ta pai ashi.

(Maneni tapak 8 nung...)

PTI-i tepuokdak Imran Khan ajurutsü meranger



Salman Akram Raja

Rawalpindi, Luchii/

December 16 (Agencies):

Pakistan Tehreek-e-Insaf (PTI) ajanga par party tentetsang aser taoba ato kilonser Imran Khan ajurutsü temelaba meshia liasü, shiba tang Adiala Jail, Rawalpindi nung yua lir. PTI party-i iba tepuokdak ketdangsür dang Islamabad High Court ajanga lenir ajurutsü mela totuyuba agüja aliba athishia December 16 nü ajurutsü mepishia liasü.

Iba shiti ya PTI General Secretary Salman Akram Raja-i zülu aser ketdangsür dang court totuyuba nung aliba ama Imran Khan den party nungi teshimtet nisungtemi ajurutsü melang ta ashi. Khan den

majurutepdaktsüba atema PTI lenirtemi aiben tebilemtsü lemsatepa arur aser party nungi teshimtet nisungtem den ajurutsü ya 'organisational matter' aser ozüng tsütsü aser yimtenren tsütsü inyakyim balala indang osang agütsütsü atema nüngdak ta ashir.

Ajisüaka Adiala Jail administration nung ketdangsür temi tangbo Imran Khan den 'political meetings' memelatsü ta tejangja shiogo. Ozüng agi melaba ama kinunger aser okatsür tem den ajuruteptsü melar, saka tepuokdak telung nung yimten inyakyimtsü mela mali, ta tepuokdak ketdangsür kati ashi.

Khan temang majung lir aser kanga mejungi amshir ta bilemba tai ta jail ketdangsür temi ashi. Imran Khan junga dang lir aser jail manual nung aliba ama facilities ajunga agütsür, ta Adiala Jail nung ketdangsür kati ashi.

Taoba ato kilonser ya barrack balaka nung yua lir saka 'solitary confinement' masü, ta ketdangsüri ashi.

Teti hopta ana nung khen medical examination agiba ama Imran Khan Hombarnü temang reprangogo aser medical reports ajak shidak dang lir ta osang ajanga ashi. Ajisüaka doctor temi pa dang tang tzüngsang mopung takong asüba yong tali anisüngzüksü ajungshi.

Imran Khan den ajuruteptsü tetsüsa melaba ya December 2 nü liasü, aser iba mapang teyi Dr Uzma Khan dang pa ajurutsü mela. Iba sülen shinga dena ajuruteptsü memela, aser kinunger densema shinga dena sensaksem maka anogo 14 ajunger.

Khan ya talisa taoba mapang ato kilonser inyaka lir asünung, pa den ajuruteptsü memelaba ya temzüng-ozüng aser humanitarian tsütsü aibelen lir ta PTI nokdaka lir. Pa ajurutsü temelaba meshiba magütsüra party-i court tem dangi aotsü imlar.

Kasa mapang iba tepuokdak ketdangsür temi ozüng kubok mapa ajak inyaker aser Imran Khan indang security, health, temeden ajak shidak lir ta ashir.

M23 teloki Uvira jila nungi atsüngintsü mulunga agizükogo

Kinshasa, Luchii/December

16 (Agencies):

Rwanda-i teyari agütsüba M23 teloki ashiba agi, US-i mepeshiba sülen parnoki Congo anütoklen Uvira jila nungi atsüngintsü telemtetba agiogo. Iba jila ya parnoki taoba hopta atsüng aser US-i iba jenjang agiba atema parnok aitsüogo aser ashiba agi, iba inyakyim ajanga tang yimjung atema inyaktepa aliba nung tetsükdaktsü adoktsü.

Congo aser Rwanda na tir US tir Donald Trump den Washington nung ajurutept aser tenati Washington Accords ta nüngja agütsür yimjung atema tenangzüktepba ka yanglur aliba atema maneni bendanga agütsür aliba metetdaksüba sülen hopta majung tsüngda M23 pur Burundi den arrtsü nung aliba Uvira jilai yagi ia liasü.

U.S. Secretary of State Marco Rubio-i Honibarnü,, Congo anütoklen Rwanda inyakyim ajanga Washington Accords nung aibelenogo ta ashiba den, tir dang

nanzükbatem ajak benoka inyaktsü atema jenjang tapet agitsü, ta shisem.

M23 pur nem teyari magütsü ta Rwanda-i shiogo aser tang asendenshir raraba atema Congo aser Burundi army dak tai tonglokja liasü. United Nations kübok mongintem telok kati July ita ashiba agi, M23 telok ya Rwanda tetuyuba nung inyaksangshir aser parnoki azioka lir.

Congo River Alliance of insurgents, kong M23 densema lir, iba telok lenir Corneille Nangaa-i X ajanga telungpurtem iba jila nungi atsüngintsü, ta ashi.

Doha nung yimjung atema sensaksemba takok ngudaktsütsü atema takok tashi lenmang sadema lapoktsütsü asoshi iba jenjang ya agi, ta pai ashi.

Washington nung sensaksemba nung M23 pur densema mali, saka parnok ya Qatar-i ayongzüka Congo sorkar den sensak asemba nung densema lir.

AO 2026 masaya tsüngda Djokovic Adelaide nung asayatsü



Luchii/December 16, 2025 (Agencies): Novak Djokovic taruba küm Australian Open 11buba aser Grand Slam 25 akoktsü memerang tsüngda Adelaide International nung asayatsü.

Asayamung ketdangsürtemi Mongolbarnü ashiba agi Serbia nunger nüngtugu asayar ya Adelaide International nung January 12 nungi 17 tashi asayatsü, koba Australian Open masaya tsüngda renemshiba asayamung ka asütsü. Taruba

Australian Open ya Melbourne Park nung January 18 nü nungi tenzüka asayatsü.

Arishi küm 38 tain world No. 4, asayar Djokovic-i Adelaide ya kanga junga meteta lir. Pa iba asayamung nung 2007 aser 2023 küm ta anaben asayaogo aser anaben kokogo.

Djokovic-i 2023 küm sülen Grand Slam ka danga koka mali aser pa asayamung aika nungbo masaya, saka 2025 küm pai kanga junga asaya-a Geneva aser Athens nung asayamung

kokogo aser November ita otsü tasen yangluogo.

November 17 nü ATP indang tatemangbuba rankings sayaba mapang pa pezübuba nung liasü aser iba ajanga pa ya ATP Top 4 nung küm tembangba asayar tambusang aküm. Iba alizüng tongtetba sülen pa indang career nung pa Top-4 nung 16benbuba tembanga Roger Federer (15) aser Rafael Nadal (15) naprongla ajateta liasü.

Open Era nung tebur asayar troki dang arishi küm 35 sülen Top 4 nung season tembanger lir. Djokovic-i iba jenjang ya anaben ajangzükteter lir. Federer-i asemben, Nadal, Rod Laver aser Jimmy Connors nungeri khen khen ajangzüktetogo.

Adelaide nung asayatsüpurtem rongnung Jack Draper, Joao Fonseca, Tommy Paul aser Stefanos Tsitsipas nunger densema lir.

Tetsürtem rongnung Australian Open tesüsabuba koker alila Madison Keys, Jessica Pegula, Mirra Andreeva aser Ekaterina Alexandrova nunger densema lir.

Brendan Rodgers Al Qadsiah coach kümogo

Luchii/December 16, 2025 (Agencies): Taoba mapang Celtic aser Liverpool manager Brendan Rodgers Saudi Pro League club Al Qadsiah indang head coach kümogo. Celtic toktsüba sülen hopta tenet lir pai iba mapa agizükogo.

Arishi küm 52 tain Rodgers-i, Hoops board aitsüba den parnok indang transfer market signings dak sendakba nung ken o ashishiba sülen October ita club tokja liasü. Iba mapang club indang principal shareholder Dermot Desmond-i, pa ya telem dang adodaktsür, tangar anisar aser pei asoshi dang bilemba nisung ka ta shia liasü.

Al Qadsiah ya Saudi state indang oil company Aramco

indang lir aser parnok Saudi league nung pongububa nung lir. Club-i Deobarnü head coach Michel Gonzalez mapa nungi anenja liasü.

Rodgers ya taoba mapang Celtic anemer Rangers indang CEO James Bisgrove-i anisemogo, shiba Al Qadsiah nunga kasa mapa inyakdar.

Bisgrove-i ashiba agi, Rodgers' Al Qadsiah-i aruba ya club atema tongtibang mapang ka lir.

January transfer window matong tsüngda Rodgers club nung denogo. Iba transfer window nung club-i team akangshitsü imlar.

Club nung tang nüngtugu asayartem rongnung Italy nunger international asayar Mateo Retegui aser taoba

mapang Real Madrid defender Nacho Fernandez na densema lir.

Rodgers lenisüba nung Liverpool pur 2013-2014 Premier League season nung tanabuba jenjang nung tembang aser 2021 küm Leicester nung inyakba mapang FA Cup koka liasü.

Celtic nung anabenren inyakba mapang pai league pezüben akok, Scottish Cup asemben aser League Cup pezüben koka liasü.

Rodgers-i club toktsüba sülen taoba manager Martin O'Neill-i interim basis nung Celtic achayanga liasü saka French coach Wilfried Nancy-i coach mapa agizükba sülen parnok asaya mezügbuba asem atonga tamakok nguogo.



Tata Motors mendenbuba Natarajan Chandrasekaran, Tata Passenger Electric Mobility tekolakba Shailesh Chandra aser India tetsür cricket team, Mumbai nung tetushi agütsüba sentong ka nung tangokba noksa nung angur. India tetsür team-i otsüsütsüsa World Cup akokba atema Tata Motors-i, parnok nem tawa sayaba Tata Sierra SUV kaka agüja liasü.

YR&S department-i selection trials indang metetdaksü

Dimapur, Luchii/December 16 (TYO): Department of Youth Resources & Sports-i sangdong ka ajanga, Indira Gandhi Academy, Kohima aser State Sports Hostel, Dimapur nung züngoksemtsü asoshi selection trials agitsü aliba metetdaksüogo.

Academic session 2026 atema disciplines balala asoshi arishi küm 14 tekübok aliba asayartem selection trials asoshi jaokogo.

Indira Gandhi Academy, Kohima nung Archery (tebur aser tetsür); Wrestling (tebur aser tetsür), Football (tetsür) asaya atema January 20 nü Indira Gandhi Stadium, Kohima nung 10 ako nungi tenzüka

trials agitsü.

State Sports Hostel, Dimapur nung Sepaktakraw (tetsür), Athletics (tetsür), Football (tebur) asaya atema Indira Gandhi Stadium, Kohima nung January 22 nü 10 ako nungi tenzüka selection trails agitsü.

Form tem ya selection agitsüba tesem tonga aruba sülen agitsütsü. Registration ya kasa anogo agitsü aser candidate temi AADHAR card, Birth Certificate, taoba) academic year ana indang Mark sheet, tawa tangokba passport size photo aser entry fee sen 100 agütsütsüla, ta kasa sangdong ajanga metetdaksüogo.

IPL: Green sen tasaktiba agi aliba bendanger asayar kümogo

Luchii/December 16, 2025 (Agencies): 2026 IPL auction nung Kolkata Knight Riders puri sen crore 25.2 agi alizükba sülen Australia nunger all-rounder Cameron Green, Indian Premier League puti otsü nung sen tasaktiba agi aliba bendanger asayar kümogo.

Rajasthan Royals aser Chennai Super Kings na den toktepba sülen KKR puri Green alizükogo. Pa atema sen crore 25.2 agütsüba yagi KKR puri 2024 auction nung Australia nunger pace bowler Mitchell Starc atema sen crore 24.75 agütsüba ajatetogo.

Kasa mapang nung Green ya IPL puti otsü nung sen tasaktiba agi alizükba asayar tasembuba kümogo.

India wicketkeeper Rishabh Pant-i otsü tasen ka yanglua pa 2025 auction nung Lucknow Super Giants puri sen crore 27 agi ali aser India nunger batter Shreyas Iyer-a Punjab Kings puri crore 26.75 agi alizüka liasü.

Arishi küm 26 tain Green ya IPL nung Mumbai Indians aser Royal Challengers Bengaluru nungi asayaogo aser asaya 29 nung pai run 707 yanglu aser wicket 16 agir lir.

Pa ya batters category nung yokogo, saka Green-i ashiba agi, pa all-rounder ama asayatsü renema lir aser iba ya pa indang manageri aibelenba lir.

Green teberem yiruba ajanga pa indang career nung minpronga arudar aser 2025 IPL nunga pa surgery agiba ajanga masayatet. Pa taküm June ita nungi specialist batter ama asayadar, saka Australia-i tang England den asaya aliba Ashes asayamung nung all-rounder ka ama amshidar.

IPL auction nung England nungera 18 lir. Opener Ben Duckett taruba küm mezügbuba IPL asayatsü. Pa Delhi Capitals puri crore 2 agi alizükogo saka Liam Livingstone, Gus Atkinson, Jonny Bairstow, aser Jamie Smith nungerbo shingaia mali.

BENDANGLI OSANG : Tapak 7 nungi...

Cambodia nungi lisopurtem anir...

Mongolbarnü Bangkok nung foreign ministry-i ashiba agi, Poipet nung Thai nungertemi tayimtsü ajanga kidangi meyipa arutsü asoshi Siem Reap yimti nung amenoka aliba consulate dang teyari meshitsü akok. Ministry-isa, Cambodia nung aliba Thai nungertem dang parnok linük toktsür onera ketdangsürtem den t o n g t e p r a t e p t s ü metetdaksüogo.

U.S. tir Donald Trump densema linük balalai rara anentsü asoshi inyakteptsü ayongzüko. July ita-a linük ana anogo pongu tashi raratepa liasü, koba Trump teyongtsüi aiba sülen anena liasü.

"Army-i ashiba agi, arrtsü

nung maneni raratepdar. Tensa mejungi lir," ta Thai defence ministry otongdar Surasant Kongsiri-i ashi.

Kasa mapang nung Thai PM-i osangbenertem dang, ceasefire atema linük balalai kecha tenongshiba mali, ta ashi. Kidanger ana tsüngda arrtsü junga lateta maliba ajanga küm aika mangatetep adoka arudar, ajisüaka tawa asendenshir tesashiba raratepdar. Iba rara tenzüka atema kati ka dak tai tongloksütepa arudar.

Ceasefire ka benokdaksütsü atema merangba mapang Malaysia nung taruba hopta Southeast Asian foreign minister tem senden ka amentsü.

BILEMDANGANG

"Peisasa dak tamang makateter nem na tanishidaktsü."